

CONVENIO MARCO DE COLABORACIÓN ENTRE A CONSELLERÍA DE SANIDADE E A FUNDACIÓN BIOMÉDICA GALICIA SUR PARA O INTERCAMBIO DE COÑECEMENTO, A INNOVACIÓN, A INVESTIGACIÓN E A DIFUSIÓN DE INFORMACIÓN EN MATERIA DE SAÚDE PÚBLICA.

18.07.2023

REUNIDOS

Dunha parte, don **Julio García Comesaña**, conselleiro de Sanidade e presidente do Servizo Galego de Saúde, actuando en nome e representación da consellería, así como da Escola Galega de Saúde Pública, de conformidade co establecido no artigo 34 da Lei 1/1983, do 22 de febreiro, reguladora da Xunta e da súa Presidencia; no Decreto 136/2019, do 10 de outubro, polo que se establece a estrutura orgánica da Consellería de Sanidade; no Decreto 86/2022, do 19 de maio, polo que se establecen a creación e o marco normativo regulador das actividades da Escola Galega de Saúde Pública e na Lei 1/2016, do 18 de xaneiro, de transparencia e bo goberno; así como na Lei 40/2015, do 1 de outubro, de Réxime Xurídico do Sector Público.

Doutra parte, dona **Beatriz Gil de Araújo de Simón**, actuando en calidade de directora da Fundación Biomédica Galicia Sur (en adiante FBGS), con NIF e sede no Hospital Álvaro Cunqueiro, Blq. Técnico, Planta 2, Ctra. Clara Campoamor nº341, 36312 Vigo, inscrita no Rexistro de Fundacións co número de Rexistro 2002/17, en virtude des atribucións que ten conferidas mediante escritura pública de apoderamento outorgada ante o notario do Ilustre Colexio de Notarios de Vigo, , con data 22/12/2020, baixo o número do seu protocolo.

As partes recoñécense mutuamente a capacidade xurídica necesaria para subscribir en nome das súas respectivas entidades o presente convenio marco, e a tal efecto

MANIFESTAN

I.- Que a Lei 14/1986, de 25 de abril, xeral de sanidade obriga ás administracións públicas sanitarias a orientar as súas actuacións prioritariamente á promoción da saúde e á prevención das enfermidades. A mesma lei indica que as Administracións Públicas levarán a cabo actuacións dirixidas ó fomento da investigación científica no campo específico dos problemas de saúde, atendendo ás diferencias entre mulleres e homes.

Por outra banda, a Lei 8/2008, de 10 de xullo, de saúde de Galicia, no seu artigo 49 configura á saúde pública como prestación sanitaria e, como tal, determina o seu contido, que abrangue desde a medición do nivel de saúde da poboación e a identificación dos problemas e riscos para a saúde, o fomento da formación e da investigación científica en materia de saúde pública e calquera outra acción ordenada para mellorar a saúde da poboación, entre outras.

A Lei 33/2011, do 4 de outubro, xeral de saúde pública, ten por obxecto establecer as bases para que a poboación alcance e manteña o maior nivel de saúde posible a través das políticas, programas, servizos e, en xeral, actuacións de toda índole desenvolvidas polos poderes públicos, empresas e organizacións cidadás coa finalidade de actuar sobre os procesos e factores que máis influen na saúde, e así previr a enfermidade e protexer e promover a saúde das persoas, tanto na esfera individual como na colectiva.

A dita lei establece no título II as actuacións en materia de saúde pública (vixilancia e promoción da saúde, prevención dos problemas de saúde e protección da saúde da poboación, entre outras).

O seu título IV fai referencia aos principios de formación e desenvolvemento profesional no ámbito da saúde pública, así como á investigación no desenvolvemento das políticas de saúde.

No ámbito autonómico, a Lei 8/2008, do 10 de xullo, de saúde de Galicia, centra o

modelo de saúde na cidadanía e sinala como unha das principais funcións da consellería competente en materia de sanidade a acreditación e avaliación continua dos servizos de saúde prestados na Comunidade Autónoma. A mesma lei, no artigo 49 do capítulo V do seu título II, dedicado á prestación sanitaria de saúde pública, inclúe o fomento da formación e investigación científica nesta materia. No artigo 107 do título VII cita a promoción da docencia e investigación en saúde pública como función da Consellería de Sanidade.

De conformidade co Decreto 136/2019, de 10 de outubro, polo que se establece a estrutura orgánica da Consellería de Sanidade, corresponde a esta a superior dirección e control da execución da política da Xunta de Galicia en materia de saúde, planificación e asistencia sanitaria e farmacéutica, así como o exercicio das competencias da Xunta de Galicia para asegurar á cidadanía o dereito á protección de la saúde.

Dentro da Consellería de Sanidade, corresponde á Dirección Xeral de Saúde Pública a promoción e protección colectiva da saúde da poboación galega e o desenvolvemento de programas sanitarios en materia de saúde pública.

A súa misión é a mellora da saúde da poboación galega desde unha perspectiva comunitaria. Para iso, identifica perigos para a saúde, os problemas de saúde e as poboacións mais susceptibles; avalía os riscos asociados aos perigos e os problemas de saúde identificados; vixía e monitoriza os perigos, os riscos e os problemas de saúde que afectan á poboación galega e, de acordo coas políticas de saúde da Comunidade Autónoma de Galicia, propón, planifica e, se procede, desenvolve programas e actuacións para controlar os riscos de enfermarse ou morrer prematuramente.

Por Decreto 86/2022, do 19 de maio, creouse e estableceuse o marco normativo regulador das actividades da Escola Galega de Saúde Pública, adscrita á Dirección Xeral de Saúde Pública.

A Escola Galega de Saúde Pública configúrase como como un instrumento de

participación, intercambio de coñecementos, experiencias e aprendizaxe compartido en materia de saúde pública, que ten como finalidade desenvolver un proceso continuo de innovación e actualización do coñecemento en saúde pública, que dea resposta ás variacións nas demandas e necesidades da sociedade e á evolución dos sistemas sanitarios e sociais; todo iso mediante a utilización de estratexias innovadoras e facilitadoras da captación de talento, no ámbito da formación e da investigación en materia de saúde pública; crear novos espazos de intercambio e circulación da información, fomentando a construción de redes intersectoriais que faciliten a transferencia de coñecemento entre as persoas que o necesitan e as que o xeran, apoiándose nas novas tecnoloxías da información, e apostar pola calidade dos servizos que se ofrecen, na busca da mellora continua da saúde pública galega.

Dentro das actividades da escola, o artigo 3 do citado Decreto 86/2022 prevé a promoción de colaboracións coas universidades e con outras escolas ou entidades de formación e/ou investigación, así como fomentar a colaboración coas diferentes administracións, institucións, organismos, sociedades científicas ou empresas en relación coa formación e investigación en saúde pública, con base nos correspondentes acordos ou convenios de colaboración que se establezan.

II. Que FBGS é unha entidade sen ánimo de lucro clasificada de interese sanitario por orde da Consellería da Presidencia, Relacións Institucionais e Administración Pública, do 26 de setembro de 2002 (DOG nº 193, do 7 de outubro) e declarada de interese galego por orde da Consellería de Sanidade da Xunta de Galicia do 21 de outubro de 2002 (DOG nº 216, do 8 de novembro) e baixo o protectorado da mesma, que ten afectado de forma duradeira o seu patrimonio ao desenvolvemento dos fins fundacionais definidos nos seus Estatutos e dirixidos á promoción e xestión das actividades de investigación, desenvolvemento e innovación que se desenvolven nas áreas sanitarias de Vigo, de Ourense, Verín e o Barco de Valdeorras e de Pontevedra e O Salnés e contribuír á protección da saúde da poboación e ao progreso e mellora do Servizo Galego de Saúde.

A FBGS ten por obxecto impulsar a investigación, a docencia, a formación, o

desenvolvemento científico-tecnolóxico e a innovación no ámbito sanitario e en Ciencias da Saúde, así como a realización de outras actividades que podan contribuír á consecución do obxecto fundacional, caracterizado polo interese xeral galego.

Con este propósito e consonte ao establecido nos seus estatutos, a FBGS debe servir de apoio, asesoramento e xestión aos profesionais e investigadores dos centros do Sistema Sanitario Público de Galicia e do Instituto de Investigación Biomédica de Vigo, contribuír eficazmente á consecución dos obxectivos fundacionais, solicitando o apoio das entidades públicas e privadas para os seus fins, e realizando labores de difusión e divulgación da actividade investigadora dos centros de investigación de Galicia.

Entre os fins que rexen a súa actuación atópanse os seguintes:

- Fomentar a cooperación da sociedade galega coas institucións sanitarias públicas, na consecución dos obxectivos fundacionais.
- Propoñer e levar a cabo accións de promoción e dinamización da investigación.
- Favorecer a colaboración entre os distintos equipos de investigación, así como a relación con outros centros que realicen actividades afíns.
- Difundir os resultados das actividades investigadoras e facilitar o coñecemento dos avances científicos e tecnolóxicos, fomentando así a súa aplicación.

III.- Que a Escola Galega de Saúde Pública, adscrita á Dirección Xeral de Saúde Pública, prevé fomentar a investigación en saúde pública, creando unha rede de investigación en saúde pública que favoreza a xeración e transferencia de coñecementos, preste apoio aos profesionais, promova o traballo en equipo e cree alianzas entre os diferentes organismos implicados na saúde; promover colaboracións coas universidades e con outras escolas ou entidades de formación e/ou investigación; fomentar a colaboración coas diferentes administracións, institucións, organismos, sociedades científicas ou empresas en relación coa formación e investigación en saúde pública, con base nos correspondentes acordos ou convenios de colaboración que se establezan; e crear un espazo de transferencia do coñecemento en materia de saúde pública de xeito que se facilite o establecemento de redes de aprendizaxe e

investigación áxiles e flexibles.

Para tal efecto, as partes entenden do seu común interese a conveniencia de impulsar lazos de colaboración e cooperación, co fin de sumar esforzos que permitan desenvolver actuacións no eido da docencia, o asesoramento, a investigación e a cooperación no ámbito dos seus fins e competencias respectivas.

Para tal fin desexan establecer relacións en todas aquelas materias que, sendo obxectivo común, contribúen ao cumprimento dos seus fines.

Por canto antecede, as partes asinantes na respectiva representación que cada unha delas ostenta, acordan subscribir o presente Convenio marco, que someten ás seguintes

CLÁUSULAS

PRIMEIRA.- Obxecto

As partes asinantes colaborarán en todas aquelas actividades que promovan no desenvolvemento do coñecemento e as capacidades necesarias para o desempeño profesional no eido da saúde pública, que poidan materializarse en proxectos e/ou actividades relacionados coa docencia, investigación e consultoría, así como calquera área que consideren de interese mutuo, sempre acordes ao respectivo obxecto social e finalidades institucionais.

No desenvolvemento deste Convenio Marco, as partes formalizarán Convenios Específicos en áreas preferentes de colaboración que consideren de interese nos ámbitos indicados anteriormente.

SEGUNDA.- Modalidades de colaboración

O presente Convenio marco levarase á práctica mediante a subscrición, entre as

entidades asinantes ou outras que se poidan adherir posteriormente, de Programas de Actividades (docentes, de investigación, divulgativas ou de consultoría), comprensivos das actividades nas que as institucións teñan proposto intervir conxuntamente en mutua colaboración.

As actividades que se desenvolvan no marco deste Convenio poderán adoptar, entre outras, as seguintes modalidades de colaboración, de xeito enunciativo e non limitativo:

- Deseño e desenvolvemento de actividades formativas e/ou de Investigación
- Deseño e desenvolvemento de proxectos de consultoría.
- Deseño e desenvolvemento de actividades de divulgación e intercambio de coñecemento.
- Celebración de eventos (xornadas, conferencias, foros, etc.).
- Edición de publicacións (libros, series, artigos científicos, etc.).
- Propostas de novas liñas de traballo relacionadas con actuacións en materia de saúde pública.

TERCEIRA.- Contido dos convenios específicos

A colaboración que se acorde desenvolver polas partes concretarase en proxectos individualizados, cuxas condicións e características recolleranse e concretaranse en cadanseu convenio específico que se tramitará e asinará, suxeitos ás directrices establecidas no presente Convenio Marco, contemplando como mínimo os seguintes aspectos:

- Definición do obxecto do convenio de colaboración específico.
- Obrigas das partes.
- Definición do plan de traballo e produto agardado.
- Cronograma ou prazo de execución.
- Aspectos xurídicos, temporais e de vixencia dos mesmos.
- Orzamento asociado á execución da actividade de colaboración, medios

materiais e humanos que requira a actividade, especificando as achegas de cada entidade.

- Normas de coordinación, execución e seguimento da actividade.
- Réxime de publicacións, se fose aplicable.

Cada convenio específico definirá os proxectos a realizar conxuntamente, os obxectos e termos de referencia dos mesmos, así como os mecanismos de avaliación e demais aspectos que as partes estimen conveniente.

Así mesmo, determinarase a distribución por actividades e a programación dos recursos materiais e persoais que ao mesmo se aporten. Inclúiranse igualmente as contraprestacións económicas e mecanismos de financiamento que se estipulen.

Os convenios específicos que se realicen ao abeiro do presente Convenio Marco, poderán contemplar a cesión de instalacións e a participación de persoal das institucións asinantes, coa contraprestación económica que en cada caso se estipule para a cobertura dos custes que soporte a institución cedente.

CUARTA.- Colaboración con outras entidades.

Para impulsar as actuacións que se recollen neste convenio marco poderase establecer unha estreita colaboración con outras administracións públicas e a colaboración e coordinación con outras institucións e organismos, públicos ou privados, que facilite a consecución dos obxectivos deste instrumento.

Para tal efecto, prevese expresamente a posibilidade de adhesión doutros partícipes, institucións e operadores, previa conformidade das partes.

QUINTA.- Recoñecemento público e propiedade intelectual

Na difusión que se realice de todas as accións que se desenvolvan ao abeiro deste Convenio marco, figurarán de forma expresa as institucións asinantes en calquera

publicación científica, aparición en medios de comunicación, presentación pública, etc., que estea relacionada cos contidos do presente Convenio Marco ou dos convenios específicos de desenvolvemento.

Para iso, utilizarase exclusivamente o logotipo e/ou anagrama facilitados polas partes, absténdose de efectuar cambios ou modificacións non xustificadas, e acadar o previo consentimento expreso e escrito das outras partes en cada unha das accións que se desenvolvan ao abeiro deste Convenio marco.

Os dereitos de reprodución, distribución e comunicación pública das creacións intelectuais anteriores á celebración deste Convenio serán propiedade de cada parte.

Por outra banda, a titularidade dos dereitos de reprodución, distribución e comunicación pública das creacións intelectuais xurdidas da prestación realizada determinarase polas partes nos convenios específicos que se asinen.

SEXTA.- Comisión de seguimento:

Co fin de garantir o cumprimento do Convenio Marco, ou dos convenios específicos que posteriormente se subscriban, e dos programas que ao seu abeiro se poidan realizar, créase una Comisión de Seguimento paritaria que estará integrada por:

- Tres persoas representantes da Consellería de Sanidade, designadas pola Dirección Xeral de Saúde Pública. Unha delas exercerá a Presidencia da Comisión e outra a secretaría da mesma. Ademais, unha delas actuará en representación da Escola Galega de Saúde Pública.
- Tres persoas representantes designadas pola Fundación Biomédica Galicia Sur.

A Comisión de Seguimento reunirase cando as partes o estimen necesario para o axeitado desenvolvemento e xestión do programa de actividades obxecto do Convenio marco e dos convenios específicos que se asinen, e tamén para o seguimento e

avaliación dos mesmos, podendo convocarse por calquera das partes cun mínimo de antelación de quince días, ou de corenta e oito horas se os temas a tratar así o requirisen pola súa urxencia ou necesidade, sendo presidida por unha das persoas representantes da Consellería de Sanidade.

A Presidencia da Comisión realizará a convocatoria das reunións, fixará a orde do día e velará

polo correcto desenvolvemento das sesións. De cada reunión levantarase Acta na que quede constancia dos acordos adoptados.

Son funcións da Comisión de Seguimento:

- a) Definir o Plan de Actividades que recolla propostas de colaboración específicas entre as partes nas distintas modalidades contempladas no presente Convenio Marco.
- b) Consensuar os contidos dos convenios de colaboración específicos que se definan, e avaliar posteriormente o grao de cumprimento dos mesmos.
- c) Realizar o seguimento do financiamento dispoñible para a execución das actividades, no seu caso.
- d) Interpretar as dúbidas que poidan xurdir no seu cumprimento e facilitar a resolución de potenciais conflitos pola vía amistosa.

SÉTIMA.- Duración

A duración do presente Convenio Marco de colaboración será de 4 anos, producindo efectos desde o día da súa sinatura, e poderá prorrogarse por períodos anuais, sen prexuízo de que calquera das partes poida denuncialo mediante comunicación que dea fe ás outras partes, en calquera momento da vixencia do Convenio Marco, cunha antelación mínima de dous meses. Todo isto sen prexuízo das limitacións temporais previstas no artigo 49 da Lei 40/2015, de 1 de outubro, de Réxime Xurídico do Sector Público.

A resolución do Convenio non afectará ao desenvolvemento e conclusión dos Programas e Actividades que se atopasen en execución nese momento, agás acordo expreso entre as partes.

OITAVA.- Confidencialidade

As partes acordan velar para que calquera información confidencial e/ou sensible que mutuamente poidan trasladarse no desenvolvemento do presente Convenio Marco, para o cumprimento do seu obxecto e finalidades, non poida usarse para ningunha outra finalidade distinta á expresamente prevista polas partes en cada momento.

Queda ben entendido que a obriga de confidencialidade perdurará con carácter indefinido á finalización, por calquera motivo, das relacións existentes entre as partes por mor do convenio marco ou dos convenios específicos asinados.

Queda excluída do deber de segredo e confidencialidade toda información que sexa de coñecemento público; a que fose recibida de terceiras persoas con anterioridade ao presente Convenio; a que se faga pública sen mediar culpa das partes, así como a que deba ser comunicada ás autoridades administrativas ou xudiciais ou ao público, en cumprimento da normativa vixente.

NOVENA.- Resolución anticipada.

Serán causas de resolución do presente convenio marco, as seguintes:

- a) O común acordo das partes, que se plasmará por escrito.
- b) A imposibilidade, legal ou material, de dar cumprimento ás súas cláusulas.
- c) Incumprimento total ou parcial das súas cláusulas.
- d) A vulneración do deber de confidencialidade sobre os datos de carácter persoal ou de calquera outra obriga derivada da lexislación de protección de datos de carácter persoal.
- e) Ausencia de desenvolvemento a través de convenios específicos.

En caso de extinción do convenio, por causa diferente á finalización do período de vixencia, o xeito de terminación das actuacións en curso determinarase polas partes no seo da comisión de seguimento prevista neste convenio.

DÉCIMA.- Rexistro de convenios, transparencia e bo goberno.

A sinatura deste convenio marco de colaboración leva implícito o consentimento expreso das persoas que interveñen para que a Administración pública autonómica galega poida facer públicos os datos de carácter persoal que figuren nel, de acordo co disposto na Lei 19/2013, de 9 de decembro, de transparencia, acceso á información pública e bon goberno, e na Lei galega 1/2016, do 18 de xaneiro, de transparencia e bo goberno.

DÉCIMO PRIMEIRA.- Natureza e xurisdición.

Este convenio marco ten natureza administrativa. As dúbidas que poidan xurdir sobre a súa interpretación ou cumprimento resolveranse de mutuo acordo entre as partes pola comisión de seguimento. Non obstante, en caso de persistencia do desacordo, corresponderá á xurisdición contencioso-administrativa resolver as cuestións litixiosas que poidan xurdir da súa interpretación e cumprimento.

En sinal de conformidade, as partes subscriben o presente Convenio, na data indicada na sinatura electrónica.

Pola Consellería de Sanidade

Pola Fundación Biomédica Galicia Sur

Julio García Comesaña

Beatriz Gil de Araújo de Simón